



東都事略卷第一

本紀一

承議郎新權知龍州軍州兼管内勸農事管界沿邊都巡檢使



太祖啟運立極英武睿文神德聖功至明天孝皇帝其先出于
帝高陽氏之後造父為周穆王御破徐偃封趙城因氏焉自漢
京兆尹廣漢居涿郡遂為涿郡人至唐而高祖僖祖皇帝生
焉 僖祖仕至文安令 曾祖順祖皇帝仕歷藩府從事兼御
史中丞 皇祖翼祖皇帝少有大志仕至涿州刺史贈左驍衛
上將軍 皇考宣祖皇帝少驍勇善騎射而雅好儒素起家事
趙王王鎔時梁晉爭天下晉求援於鎔鎔命宣祖以五百騎
赴之莊宗嘉其勇敢因留之命掌禁軍為飛捷指揮使自同光
至開運踰二十年不遷而宣祖亦未嘗以介意漢乾祐中王

景崇以鳳翔叛 宣祖與征討禦之於寶雞敗之殺獲萬計是役也 宣祖身先士卒面中流矢勇氣彌厉以功遷護聖都指揮使仕周累遷龍捷左廂都指揮使岳州團練使世宗征淮宣祖為前軍副都指揮使領兵先入維揚禁止侵暴民情大悅世宗嘉之未幾以疾歸與 太祖會于壽春歸及中途而崩贈武清軍節度使 太祖即第二子也以後唐天成二年二月十六日生于洛陽夾馬營 母昭憲皇后嘗夢日入懷而娠生之夕光照室中胞衣如菡萏體被金色三日不變幼受學于鄉先生辛文悅每歸必令群兒前導路人往往避之及長天姿雄偉性沉厚有大度嘗游復州于王彥超不為所禮去依隨州董宗本鬱鬱不得志又捨去乃從周太祖于鄴廣順初補東西班行首出為滑州興順副指揮使未行會世宗自澶州入為開封尹

以 太祖為馬真軍使顯德元年世宗命 太祖掌衛兵太原劉崇寇澤潞世宗親征陳于高平大將樊愛能何徽未戰而遁世宗躬自督戰 太祖謂麾下曰主危如此是吾致命之秋也即大呼躍馬徑犯其鋒萬衆披靡崇大潰世宗以 太祖為殿前都虞候領嚴州刺史加永州防禦使世宗懲樊愛能何徽之敗欲以兵力威天下命 太祖訓練武藝超絕者分隸殿前諸軍自是禁衛盛矣二年世宗命王景向訓攻秦鳳師久無功然以餽運不繼欲罷兵意未能決遣 太祖視其形勢使回具言秦鳳可攻之狀未幾悉平三年世宗征淮以 太祖領親騎翼從敗淮人于渦口唐將皇甫暉姚鳳率衆十五萬塞清流 太祖擊走之暉退保滁州斷橋自守 太祖追至城下暉曰人各為其主願成列以決勝負 太祖笑而許之暉整陣以出

太祖擁馬項直入左右馳突大呼曰吾止取皇甫暉他人非吾敵也手劍擊暉生獲之并擒姚鳳遂下滁州後數日 宣祖率兵夜半至城下傳呼開門 太祖曰父子雖至親城門王事也須明乃敢奉命至明乃入又破江南兵于六合斬首五千級時韓令坤為招討使平揚州唐主遣陸孟俊據蜀岡以逼其城令坤潛議退師 太祖下令曰揚州兵敢有過六合者吾當折其足令坤懼始有固守之志 太祖率兵擊之孟俊遁為追兵所殺又破其齊王景達兵於六合斬首萬級是役也軍士有不用命者 太祖奮劍斫其皮笠陽為督戰以識之明日索得數十人斬以徇於是皆死戰 宣祖崩起復拜定國軍節度使殿前都指揮使四年世宗復征淮至壽州命 太祖率殿前諸兵擊紫金山連珠砦拔之遂下壽州世宗還京師以 太祖領義成

軍節度使是歲世宗征濠泗以 太祖為前鋒周師以敵人壁于十八里灘不能過淮世宗患之 太祖躍馬以濟遂破其砦乘勝攻泗州焚郭門奪月城世宗親率精騎與 太祖夾淮東下師及山陽東 太祖擒其保大軍節度使陳承昭以獻遂拔楚州又破淮入于鑿江口 太祖抵南岸焚其營柵破之于瓜步淮南平唐主畏 太祖威名用間於世宗遣使遺 太祖書以白金三千兩為餽 太祖悉輸之內府由是間乃不行五年改忠武軍節度使六年世宗北征以 太祖將水陸之師至尾橋關降其守將姚內斌契丹將高模翰率數萬騎來援陳于關城之北 太祖將百餘騎禦之虜不敢動遂引去關南平世宗不豫還京師以 太祖為殿前都點檢世宗崩恭帝嗣位改鎮歸德七年春正月辛丑朔鎮定馳驛上言太原劉承鈞結契丹

入寇乃命 太祖統大軍北伐癸卯出師遣宣徽使皆居潤錢
于郊時京師多飛語云策 點檢為天子次陳橋驛軍中共議
推戴戊夜軍士聚于驛門俄而列校畢集曰我輩出萬死冒白
刃為國家破敵天子幼不如先策 點檢為天子然後北伐于
時 太祖以飲餞宣勸至醉卧閣中不之省遲明軍士控弦露
刃直扣寢門相與扶 太祖出聽事被以黃袍諸校列拜曰諸
軍無王願策 點檢為天子傳呼萬歲聲聞數十里 太祖叱
之不退即共擁 太祖就馬南歸 太祖乃勒騎謂將校曰吾
受命北征為汝輩推戴吾有號令汝能稟乎皆曰唯命 太祖
曰太后主上 北面事之朝廷大臣吾之比肩也汝等不得驚
犯宮闈侵陵朝貴近世帝王初舉兵入京城皆縱兵奔市汝等
不得奔市及犯府庫從吾令 厚賚汝違吾令則連營擊戮諸

校再拜稟令乃肅部伍自仁和門入諸校翼從 太祖登明德
門軍士釋甲歸營無敢動 太祖亦歸公府宰相范質王溥魏
仁浦謁見議遜位之禮於是 太祖詣崇元殿受禮召文武百
官就列至晡班受恭帝制曰天生蒸民樹之司牧二帝推公而
禮位三王乘時以革命其極一也予末小子遭家不造人心已
去國命有歸咨爾歸德軍節度使殿前都點檢趙某稟上聖之
姿有神武之略佐我列祖格于皇天逮事世宗功存納麓東征
西怨厥績茂焉天地鬼神享于有德謳歌獄訟歸于至仁應天
順民法堯禪舜如釋重負予其作賓嗚呼欽哉祇畏天命宣徽
使引 太祖就龍墀北面拜受宰相扶 太祖升殿易服東序
還即 皇帝位群臣拜賀 詔曰周封杞宋唐命介鄩所以重
三恪之賓奉二王之後也其奉周帝為鄭王以承周祀正朔服

色一依舊制稱朕意焉又尊帝太后為周太后遷于西宮

東都事略卷第一

東都事略卷第二

本紀二

建隆元年春正月乙巳

詔改元大赦天下國號

大宋已酉命官分告

天地社稷遣中使乘傳齎

詔諭天下丁巳祀周廟因

詔有司以時朝拜祭享令有司議

立宗廟已巳議立

四廟鎮州言太原契丹軍皆遁二月乙

亥尊帝母南陽郡大夫人杜氏曰皇太后以周宰相范質兼

侍中王溥魏仁浦仍同中書門下平章事樞密使吳廷祚同中

書門下二品己卯以吳越國王錢俶為天下兵馬大元帥三月

壬戌有司上皇高祖文安府君謚曰文獻皇帝廟號僖祖

皇高祖妣崔氏謚曰文懿皇后陵曰欽陵皇曾祖中丞府君

謚曰惠元皇帝廟號順祖皇曾祖妣桑氏謚曰惠明皇后陵

曰康陵皇祖驍衛府君謚曰簡恭皇帝廟號翼祖 皇祖妣
京兆郡夫人劉氏謚曰簡穆皇后陵曰定陵 皇考武清府君
謚曰昭武皇帝廟號宣祖陵曰安陵有司言 國家受周禪周
木德木生火當以火德王色尚赤臘用戌夏四月昭義軍節度
使李筠叛 命石守信高懷德率師討之五月己亥朔日有食
之癸卯石守信敗李筠於長平丙午周六廟成丁巳 詔親征
削奪李筠官爵吳廷祚為東京留守 皇弟為大內都點檢已
未發京師甲子石守信高懷德破李筠三萬衆于澤州南六月
辛巳 皇帝命衛士攻拔澤州李筠伏誅乙酉北伐潞州丁亥
筠子守節降澤潞平辛卯赦天下丁酉班師秋七月戊申 皇
帝至自澤潞八月戊辰朔入閣甲申立 琅邪郡夫人王氏為
皇后趙普樞密副使九月丙午冊 四親廟戊申荆南高保融
卒淮南節度使李重進叛 命王審琦李處耘宋延渥率師討
之削奪李重進官爵冬十月丁亥 詔親征 皇弟為大內都
點檢吳廷祚為東京留守庚寅發京師丁未次揚州即日拔其
城李重進伏誅揚州平十二月己巳班師丁亥 皇帝至自揚
州泉州留從效稱藩

二年春浚五丈河 上曰河渠之役蓋非獲已煩民奉已之事
朕不為也夏四月癸巳朔日有食之庚申寬益麵法五月癸亥
朔赦天下六月甲午 皇太后杜氏崩秋七月壬申以 皇弟為
開封尹同平章事八月庚子江南國王李景卒冬十月丙午
明憲皇后祔葬安陵

三年春正月甲戌 詔曰民生在勤所寶惟穀先王之明訓也
朕奄宅中夏為之司牧瞻乃億兆期臻富庶矧農桑之業為衣

食之原今陽和在辰土膏脉起當播種之云始慮游墮之尚多
苟力作之不勤則秋斂之何望諸州長吏等任居牧守職司勸
課所宜躬率黎庶勉厲農功俾比屋之人服勞於南畝三時之
務无失於西成極其薦蒸之勤用致茨梁之詠懋功信賞國典
在焉二月甲午 詔常參官每五日以次轉對三月丁亥 詔
曰王者設棺槨之品建封樹之制所以厚人倫而一風化也近
代以來遵用夷法率多火葬甚愆典禮自今宜禁之乙巳追冊
故 會稽郡夫人賀氏爲皇后夏五月大修宮闕六月癸巳吳
廷祚罷冬十月辛丑趙普樞密使李處耘樞密副使卽州周行
逢卒十一月癸亥 詔曰古稱使於四方不辱君命可謂士矣
自今使諸道敢有求託者寘其罪荆南高保勗卒十二月衡州
張文表叛攻潭州周保權使來乞師是歲周鄭王出居于房州

乾德元年春正月庚申慕容延釗李處耘率師討張文表二月
獲張文表癸巳克潭州荆南高繼冲歸朝得州三縣十七三月
克岳州戊寅克卽州慕容延釗盡平湖南之地得州十四監一
縣六十六夏四月甲申敕荆湖復增修宮闕凡規爲制度並
上指授旣成坐寢殿中令洞開諸門皆端直通寤謂左右曰此
如我心小有斜曲人皆見之秋九月群臣上尊號曰應天廣運
仁聖文武皇帝丁卯李處耘賤冬十一月癸亥 親享 太廟
甲子合祭天地于圜丘以 宣祖配大赦天下改元十二月甲
申 皇后王氏崩閏月辛未改下安陵

二年春正月辛巳 詔曰箕子之陳八政食爲之首夷吾之述
四民農居其一今土膏將起勾萌畢達平秩東作乃其時也諸
州長吏等所宜躬率勸課俾民力耕謹視游墮勿令廢業厚生

務本副予意焉大雨雪震雹戊子范質王溥魏仁浦罷趙普同
中書門下平章事李崇矩樞密使壬辰 詔曰先所置賢良方
正能直言極諫經學優深可爲師法詳開吏理達於教化三科
自今不限內外職官前資見任黃衣布衣並許詣闕進狀朕當
親試焉己亥王仁贍樞密副使二月浚閔河夏四月乙卯葬
宣祖皇帝 昭憲皇后于安陵 孝明 孝惠二后祔乙丑薛
居正呂餘慶並參知政事秋七月辛卯令翰林學士丞旨陶穀
等四十三人各舉任藩鎮通判者各一人冬十月甲戌 詔以
王全斌崔彥進王仁贍劉光毅曹彬分路伐蜀十二月王全斌
克興州與蜀軍戰于三泉敗之
三年春正月劉光毅克夔州王全斌克利州己丑克劍州劉光
毅克萬施開忠泗州乘勝至遂州甲午王全斌之師至魏城蜀

主孟昶降丙午赦蜀得州四十六縣二百四十二月癸卯命呂
餘慶知成都府王全斌殺蜀降兵二萬人於是兩川盜賊群起
詔所在討之夏五月孟昶至京師戊子赦天下六月甲辰以孟昶
爲中書令封秦國公庚戌昶卒冬十一月契丹寇易州
四年秋七月甲寅 詔曰豐年之詠播于頌聲廣蓄之訓垂於
載籍今三時不害百姓小康田里無愁歎之聲壠畝有遺滯之
穗州縣長吏等職司牧養義當勸率俾及歲穰各務儲積或值
凶歉不至匱乏古者倉廩實禮節興所宜禁民誦博勿致游墮
戒其崇儉免於靡 申嚴條教稱朕意焉王全斌克雅州 詔
曰五代以來兵亂相繼國用不足庸調繁興朕歷試艱難周知
疾苦省嗇用度未嘗加賦優卹災沴率從蠲復所在長吏明加
告諭自今百姓有能廣植桑棗墾闢荒田者只輸舊租禁將帥

取軍中精卒為牙兵冬十一月癸丑寬鹽禁

五年春正月辛丑王全斌崔彥進王仁贍並以在蜀貪殘殺戮
貶二月壬戌沈倫樞密副使夏六月戊午朔日有食之秋七月
己巳 詔曰自夏以來水旱為沴深慮民庶至於流離宜令諸
州長吏告民無轉徙被災民蠲其賦

開寶元年春二月立 皇后宋氏夏六月癸亥 詔曰人倫以
孝慈為先家道以敦睦為美矧犬馬而有養豈父子之異居傷
敗風化莫此為甚應百姓祖父母父母在者子孫無得別籍異
財長吏其中戒之秋七月太原劉承鈞死八月戊辰群臣上尊
號曰 應天廣運聖文神武明道至德仁孝皇帝九月太原劉
繼恩為其臣侯霸榮所弑冬十月以諸鎮節度為環衛十一月
癸卯合祭 天地于圜丘大赦天下改元

二年春正月戊午 詔親征太原己未 皇弟留守京師甲子
發京師乙亥駐蹕潞州三月戊戌 皇弟至太原決晉祠水灌
城夏四月壬子何繼筠敗契丹于陽曲五月甲申壅汾水灌太
原城閏月戊申太原南城陷水注城中劉繼元殺其宰相郭無
為壬戌 皇帝以暑雨班師六月癸巳 皇帝至自太原秋九
月大霖雨冬十月丁亥 詔曰昔西漢求吏民之明經術者令
與計偕縣次續食益優賢之道也國家歲開貢部敷求俊乂四
方之士無遠弗屆而經途遐阻費用或闕朕甚恐焉自今西川
山南荆湖等道舉人往來給券

三年春正月辛酉 詔諸道州府察民有孝悌彰聞德行純茂
擅鄉曲之譽為士庶推服者以聞夏四月辛未朔日有食之庚
子除河北鹽禁秋七月壬子 詔曰吏負冗多而求其治者斯

難也奉祿鮮薄而責以廉者無謂也與其冗負而重費不若省官而益奉諸道府縣官宜以戶口為率差減其負舊奉外月增給五千九月己亥 命潘美尹崇珂伐嶺南壬子潘美克富州冬十月潘美克賀州十一月克昭桂二州十二月庚午克連州戊子克韶州

四年春正月潘美克英雄二州二月丁亥克廣州擒劉鋹廣南平得州六十縣二百十四辛卯赦廣南三月乙巳 詔曰百越之人久淪虐政其令嶺南諸州長吏察偽政有害於民者以聞當悉除之夏五月乙未 皇帝御明德門受俘釋鋹罪以為右千牛衛大將軍封恩赦侯冬十月癸亥朔日有食之丙戌 詔嶺南諸州劉鋹 煩苛賦歛並除之平民為兵者招誘復業十一月癸未合祭 天地于圜丘始用綉衣鹵簿大赦天下

五年春正月壬辰大雨雪禁民以鐵鑄佛像及浮圖二月庚寅劉熙古參知政事夏五月壬戌廢嶺南媚川都禁民採珠是月霖雨放後宮五十餘人秋九月丁巳朔日有食之癸酉李崇矩罷

六年春二月周鄭王殂夏六月庚申劉熙古致仕秋八月甲辰趙普罷九月丁卯呂餘慶罷己巳 皇弟封晉王薛居正沈倫並同中書門下平章事盧多遜參知政事楚昭輔樞密副使壬申 詔晉王位宰相上冬十月甲申葬周恭帝于順陵

七年春二月庚辰朔日有食之丙子日中有二黑子秋九月遣李穆使于江南召李煜入朝煜辭以疾 命曹彬潘美征之冬十月克池州曹彬頓兵于采石磯十一月曹彬等用浮梁以濟師契丹來求通好

八年夏四月庚午吳越國王錢俶克常州五月壬申錢俶加大師詔曰嶺表之俗疾不呼醫自皇化攸及始知方藥商人齎生藥度嶺者勿算秋七月辛未朔日有食之甲申詔錢俶歸國九月克潤州冬十月己亥李煜遣其臣徐鉉周惟簡來乞緩師壬寅遣歸其國命脩西京宮闕十二月己亥曹彬克昇州擒李煜江南平得州十九軍三縣一百八江南既平捷奏至上因泣下謂左右曰宇縣分割民受其弊思布聲教以撫養之攻城之際必有橫遭鋒刃此實何罪因讀尚書歎曰堯舜之世四凶之罪止從投竄何近代法網之密邪辛丑赦江南

九年春正月戊辰朔皇帝御明德門受俘以李煜爲右千牛衛上將軍封違命侯庚辰詔以後月幸西京有事于南郊二月癸卯群臣上尊號曰應天廣運一統太平聖文神武明道至

德仁孝皇帝上以燕晉未平不許群臣復以立極居尊爲號乃許庚戌曹彬樞密使己未吳越國王錢俶來朝三月詔俶歸國壬申享太廟丙子發京師庚辰謁安陵賜河南府民今年田租之半復奉陵戶一年辛巳皇帝至西京夏四月庚子合祭天地于南郊大赦天下都民垂白者相謂曰我輩少經亂離不圖今日復覩太平天子有泣下者辛亥皇帝至自西京曹翰克江州秋八月丙辰分兵五路以討太原有神降于岐冬十月癸丑皇帝崩於萬歲殿聖壽五十殯于殿之西階群臣上尊謚曰英武聖文神德皇帝廟號太祖明年四月乙卯葬永昌陵大中祥符元年加上尊謚曰啟運立極英武聖文神德玄功大孝皇帝五年再加上尊謚曰啟運立極英武睿文神德聖功至明大孝皇帝

臣稱曰烏虜自三代以上莫不得天下以正也堯舜傳之賢而禹傳之子湯武雖以仁易暴而湯有慙德孔子謂武未盡善則是湯武尚處聖人之不幸也 太祖皇帝聰明齊聖由揖遜而有天下如堯與舜至於天祿之傳不歸之子而歸之 弟則賢於禹遠矣况湯武乎烏虜得天下以仁棄天下如脫屣數千百載之間繼堯舜之正者唯 太祖為不可及也已

東都事略卷第二

東都事略卷第三

本紀三

太宗至仁應道神功聖德文武睿烈大明廣孝皇帝 宣祖第三子也母曰昭憲皇后后夢神人捧日寘于懷遂有娠以晉天福四年十月甲辰生於開封府浚儀縣崇德坊官舍赤光滿室幼穎悟好讀書 宣祖為將征淮上克州縣諸將皆爭子女玉帛 宣祖為訪其書籍歸以遺 太宗謂之曰文武立身之本汝其勉之及長隆準龍顏望之儼然周顯德初補右班殿直遷供奉官五年改殿前祗候供奉官都知太原劉承鈞結契丹寇邊命 太祖北伐 太宗從行至陳橋為六軍推戴 太祖受周禮以 太宗為殿前都虞候領睦州防禦使 太祖征澤潞留為大內都點檢領泰寧軍節度使 太祖征李重進又為

大內都點檢二年為開封尹同平章事乾德二年拜中書令開
寶初 太祖征太原以為京師留守六年封晉王有 詔班宰
相上九年十月癸丑 太祖崩奉 遺詔即 皇帝位大赦天
下庚申以皇弟廷美為開封尹封齊王 太祖子德昭始封武
功郡王盧多遜同中書門下平章事楚昭輔樞密使十一月甲
午追冊 故尹氏及 越國夫人符氏為皇后丁卯 詔曰帝
堯之化寶光於勃族成周之制爰後於異姓自今朝會齊王廷
美武功郡王德昭位宜在宰相上

太平興國元年冬十二月甲寅大赦天下改元
二年春二月庚子 皇帝更名夏四月乙卯葬 英武聖文神
德皇帝于永昌陵秋八月作崇聖殿冬十一月丁亥朔日有食
之既

三年春三月己酉吳越國王錢俶來朝夏四月己卯陳洪進以
漳泉兩州歸于有司得縣十四五月乙酉赦漳泉吳越國王錢
俶以國歸于有司得州十三軍一縣八十六丁亥徙封錢俶為
淮海國王戊子赦兩浙秋七月乙酉大雨震電八月黃河清甲
戌群臣上尊號曰 應運統天聖神文武皇帝冬十一月丙申
合祭 天地于圜丘大赦天下

四年春正月庚寅以潘美伐太原石熙載僉書樞密院事二
月辛亥 詔幸鎮州丙辰沈倫為東京留守甲子發京師三月乙
未郭進大破契丹于石嶺關夏四月庚戌石熙載樞密副使壬
戌 皇帝幸太原折御卿克岢嵐軍乙丑克隆州己巳克嵐州
辛未 皇帝幸太原城以 手詔諭劉繼元五月壬午幸城南
癸未劉繼元降釋其罪太原平得州十軍一縣四十一乙酉赦

太原己丑以劉繼元為右衛上將軍封彭城郡公丁酉隴隆州
六月庚申北征庚午次幽州秋七月甲申班師乙巳 皇帝至
自范陽八月甲戌武功郡王德昭薨冬十月乙亥 皇帝至
進封秦王

五年秋七月丁未討交州冬十一月丙午以秦王廷美為東京
留守己酉 詔幸北邊壬子發京師戊午駐蹕于大名十二月
乙酉 皇帝至自大名

六年春三月己酉 太祖子德芳薨交州行營大破賊軍于白
藤江口夏六月甲戌薛居正薨秋九月乙未朔日有食之辛亥趙
普為司徒兼侍中石熙載樞密使秦王廷美乞班趙普下從之
壬子 詔曰古者振木鐸于路所以來四方之風謠設獸樽于
庭所以延群臣之諫諍在朝內外官自今或知民間利病及時

政得失並得直言無隱冬十月癸酉群臣上尊號曰應運統天
睿文英武大聖至德廣孝皇帝十一月癸亥合祭 天地于圜
丘大赦天下癸丑楚昭輔罷

七年春三月癸巳朔日有食之乙巳以皇弟廷美為西京留守
交州遣使來謝罪唐州蝗夏四月甲子竇衍郭贇並參知政事
柴禹錫樞密副使盧多遜罷乙丑皇弟廷美勒歸第盧多遜流
崖州庚辰沈倫貶五月己酉夏州李繼捧來朝以其地來獻得
州四縣八繼捧之弟繼遷叛丙辰皇弟廷美降封涪陵公房州
安置秋七月甲午皇子德崇封衛王德明廣平郡王冬十月己
卯竇衍薨十二月戊午朔日有食之丙午赦銀夏等州令諸州
置農師

八年春正月戊寅曹彬罷己卯王顯弭德超並樞密副使癸未

詔曰養老乞言哲王之玉訓觀民設教載籍之大猷故適人振鐸以采詩刺史褰帷而按部所以參考風俗周知其淑慝延訪耆艾詳求於利病斯為茂典可舉而行宜令州縣長吏或部內有耆德高年為鄉里所信者並須延問民間疾苦吏治得失退而行之以稱吾意甲申 詔曰傳云能以禮讓為國乎何有宜令開封府及諸州於衝要處設榜刻儀制令論如律二月戊子朔日有食之三月庚申宋琪參知政事甲申除福建諸州鹽禁夏四月壬子弭德超流瓊州六月己亥王顯樞密使秋七月辛未郭贄罷庚辰李昉參知政事八月庚戌石熙載罷冬十月己酉趙普罷皇子元佐封楚王元佑陳王 皇第三子封韓王元俊冀王元傑益王十一月壬子宋琪李昉並同中書門下平章事甲寅令宰相班諸王上壬申李穆呂蒙正李至並參知政事

張齊賢王沔並同僉書樞密院事

雍熙元年春正月壬戌求遺書於天下乙丑涪陵公廷美卒癸酉李穆薨夏四月甲午 詔以今年十一月有事于泰山五月廢諸州農師丁丑乾元文明殿災六月丁亥 詔求直言 上

謂近臣曰朕訪求讜議以規已失昔禹拜昌言世稱其明今之諫者苟能中時病朕豈惜夏禹之拜乎壬寅 詔罷封泰山以

冬至有事於南郊秋八月丁酉 親祠太一宮冬十一月丁卯合祭 天地于圜丘大赦天下改元十二月庚辰錢俶改封漢南國王壬辰 德妃李氏立為皇后

二年秋九月庚戌楚王宮火辛亥楚王元佐廢閏月乙未 詔曰嶺南之俗民嫁娶喪葬衣服制度委所在長吏漸加戒厲俾遵條式其殺人祭鬼病不求醫僧置妻孥深宜化導使之悛革

冬十二月庚子朔日有食之丙辰宋琪柴禹錫罷

三年春正月庚寅命曹彬崔彥進朱信田重進潘美北伐契丹
戊戌李至罷三月曹彬克契丹固安城田重進破契丹于飛狐
北潘美自西陞與契丹遇追至寰州克之辛巳曹彬克涿州潘
美取朔州又取應州田重進圍靈丘夏四月潘美克雲州五月
曹彬等與契丹戰于岐溝關我師取績潘美還代州徙雲應寰
朔四州之民分置河東及京西計口給田免其租役六月戊戌
朔日有食之辛仲甫參知政事秋八月丁酉王沔張宏並樞密
副使雲州觀察使楊業與虜戰死之冬十二月王師敗績于君
子館

四年春二月丙申錢俶封南陽國王甲寅錢俶改封許王夏四
月癸巳張宏罷趙昌言樞密副使冬十一月庚辰 詔曰王者

設班爵以馭貴差祿秩以養賢所以責之廉隅懋其官業也奉
給之數宜從優厚應百官奉錢給佗物以八分為十者自今給
其實數

端拱元年春正月戊辰黃河清乙亥 親耕籍田始三推 上

曰朕志在勤農恨不得終於十畝豈止以三推為限哉遂耕數
十步大赦天下改元二月丙申李昉罷趙普為太保兼侍中呂
蒙正同中書門下平章事皇子元僖封許王 皇第三子封襄
王元份越王錢俶徙封鄧王王沔參知政事張宏樞密副使楊守
一僉書樞密院事庚戌皇子元偃封徐國公元偁涇國公三月
乙丑趙昌言貶乙亥誅侯莫陳利用于商州秋八月甲子鄧王
錢俶薨九月乙酉楊守一卒

二年秋七月己卯張齊賢樞密副使張遜僉書樞密院事戊子

堯出東井八月丙辰大赦天下冬十二月庚申 詔曰堯先哲
王託居人上蓋務求於至治豈有尚於虛名矧乃皇帝之稱已
極崇大爰自唐室始加美號 詢臣子之愛戴著方策之典常踵
事增華積習無改朕博考載籍追法古道既異三五之舊制深
懼賓賓實之有踰憚然自思不遑寧處自今四方所上表宜祇稱
皇帝上又謂宰相曰皇帝二字亦不可兼蓋起於秦始皇後
代因之不改朕比欲止稱王但以諸子封王為不便耳群臣上
表請復尊 上不許又上法天崇道文武皇帝 詔去文武
二字乃許

淳化元年春正月戊寅朔改元戊子趙普罷秋八月己巳禁川
峽嶺南採牲

二年春閏二月辛未日有食之三月乙丑辛仲甫罷夏四月辛

巳張齊賢陳恕並參知政事張遜溫仲舒寇準並樞密副使張
宏罷秋七月李繼遷歸順九月丁酉王沔陳恕罷己亥呂蒙正
罷李昉張齊賢並同中書門下平章事賈黃中李沆並參知政
事癸卯王顯罷甲辰張遜知樞密院事溫仲舒寇準同知院事
三年春正月乙巳 詔曰昔舜之有天下也選於衆而舉善人
則不仁不善者斯遠矣矧今提封至廣設官尤衆銓選既限於
常調英俊或沉於下僚俾振滯淹屬在倫類傳不云乎如有所
譽者其有所試矣朕當親覽而進之其令常參官舉升朝官者
各二人二月乙丑朔日有食之夏五月早秋七月己酉太師趙
普薨冬十一月己亥開封尹許王元僖薨

四年春正月辛卯合祭 天地於圜丘以 宣祖 太祖並配
大赦天下二月己未朔日有食之盜起于蜀夏六月丙寅張齊

賢罷壬申張遜寇準罷柴禹錫知樞密院事呂端叅知政事劉
昌言同知樞密院事秋八月丙辰朔日有食之冬十一月辛未
李昉賈黃中 溫仲舒並罷呂蒙正同中書門下平章事趙
鎔向敏中同知樞密院事蘇易簡叅知政事丁丑趙昌言叅知
政事十二月賊推李順為首陷蜀州又陷邛州又陷永康軍
五年春正月李順陷漢州又陷彭州癸酉命李繼隆討李繼遷
甲戌 命內侍王繼恩率兵討李順二月李順陷成都府夏四
月李繼隆克夏州擒趙保忠以獻 詔釋之授右千牛衛上將
軍封宥罪侯壬寅王師克劍州五月克閬州又克巴州師進破
賊十萬遂克成都李順之黨並伏誅秋八月蜀寇平九月壬申
皇第三子為開封尹封壽王大赦天下 上謂壽王曰政教在
得人心而不擾之得人心莫若示之以誠信不擾之無如鎮之

以清淨推是而行雖虎兕亦當馴狎况於人乎書曰撫我則后
虐我則讎信哉斯言也 爾宜戒之乙亥寇準叅知政事丁丑
詔曰朕惟蜀川文翁之化在焉乃者盜興畎畝連陷州城靜言
思之非民之咎蓋由朕委任非當燭理不明親民之官失於綏
養筦權之吏恣其誅求致然也念茲失德是務責躬永鑒前非
庶無貳過咨尔民庶當體朕懷是歲大有年
至道元年春正月戊申朔改元丙辰上清宮成 上曰朕在藩
邸以 先帝所賜營是宮欲以祈福而庇民也癸亥趙昌言罷
戊辰錢若水同知樞密院事劉昌言罷三月庚申 詔曰國家
郡縣至廣吏負衆多自公卿以至卑品逮千萬數皆懷材抱器
明習利病非開言路曷導下情宜令幕職州縣等官並許言公
私利害附傳置以聞夏四月癸未呂蒙正罷呂端同中書門下

平章事蘇易簡柴禹錫罷張洎參知政事甲申趙鎔知樞密院
事甲辰 開寶皇后宋氏崩秋八月壬辰 詔以 皇第三子
開封尹壽王爲皇太子大赦天下改元

二年春正月辛亥合祭 天地于圜丘大赦天下二月庚辰李
昌齡參知政事秋七月丙寅寇準罷

三年春正月丙子溫仲舒王化基並參知政事李惟清同知樞
密院事張洎罷乙酉葬 孝章皇后于昌陵之北二月靈州行

營大破李繼遷繼遷遁辛丑 皇帝不豫三月癸巳 皇帝崩
于萬歲殿聖壽五十九殯于殿之西階群臣上尊謚曰 神功

聖德文武皇帝廟號 太宗十月己酉葬 永熙陵大中祥符
元年加上尊謚曰 至仁應運神功聖德文武大明廣孝皇帝

五年再加上尊謚曰 至仁應運神功聖德文武睿烈大明廣

孝皇帝

臣稱曰 太宗以英睿之姿佐 太祖定天下開子孫帝王萬

世之業故 太祖勤勤於傳襲非特以 昭憲顧命而已
太宗以明繼聖而能廣文之聲卒其伐功乃大一統于時北自

常碣南極嶺表東際海岱西接洮隴 宋之威德斯爲盛矣

東都事略卷第三

東都事略卷第四

本紀四

真宗膺符稽古成功讓德文明武定章聖元孝皇帝 太宗第三子也 母曰元德皇后李氏以開寶元年十二月生于開封第赤光照室幼而聰睿姿表奇異與諸王戲好作戰陳之狀自稱元帥 太祖愛之謂之曰汝為天子否對曰由天命耳太平興國八年拜同中書門下平章事封韓王端拱元年加侍中荆南淮南節度使封襄王淳化五年為開封尹進封壽王至道元年八月立為皇太子仍判府事三年三月癸巳 太宗崩奉遺制即 皇帝位于 匱前夏四月乙未尊 皇后曰皇太后大赦天下皇弟元份封雍王元傑堯王元偓彭城郡王元偁安定郡王元儼曹國公李至李沆並參知政事五月丁卯 詔求直言

極諫甲戌李昌齡貶丁亥立 秦國夫人郭氏爲皇后六月戊
戌皇叔廷美追復秦王辛丑 詔天下勿得以祥瑞來獻甲辰
皇兄元佐復封楚王乙巳追冊呂國夫人潘氏爲皇后錢若水
罷秋八月己亥曹彬樞密使兼侍中趙鎔罷向敏中夏侯嶠並
樞密副使李惟清罷冬十月乙酉葬 神功聖德文武皇帝于
永熙陵十二月丙申追尊 帝母賢妃李氏爲皇后
咸平元年春正月辛酉朔改元甲申有彗出營室比二月甲午
詔曰昔之哲王樂聞已過博延讜論庸致時雍矧于冲人始嗣
基業政化猶鬱星變遽彰敢忘責躬以答垂譴其令有位極言
無隱夏五月戊午朔日有食之冬十月丙戌朔日有食之戊子
呂端罷張齊賢李沆並同中書門下平章事李至罷己丑溫仲
舒夏侯嶠罷向敏中參知政事楊礪宋湜並樞密副使

二年春閏三月庚寅

詔開言路夏六月

詔曰服用之制條

式具存儻奢僭不懲則耗蠹茲甚自今臣庶有鋪金泥玉之飾
其禁之戊午曹彬薨己丑王顯樞密使秋八月乙卯群臣上尊
號曰 崇文廣武聖明仁孝皇帝癸酉楊礪薨九月庚辰朔日
有食之冬十一月丙戌合祭 天地于圜丘奉 太祖 太宗
並配大赦天下契丹寇邊乙未 詔幸河北己酉李沆留守京
師十二月甲寅發京師戊午駐蹕澶州甲子次大名契丹寇威
虜軍王師破契丹于五合川

三年春正月己卯朔益州軍亂向敏中權同知樞密院事契丹
寇河間康保裔死之庚申赦河北壬辰宋湜薨甲午發大名益
州叛軍推王均爲首庚子 皇帝至自大名二月癸亥王顯罷
周瑩王繼英並知樞密院事王旦同知院事三月戊寅朔日有

食之已卯葬 元德皇后夏五月丁丑赦天下六月丁卯向敏中為河北河東宣撫大使冬十月雷有終復益州王均伏誅十一月壬午 詔曰在昔黃帝有下風之問伯禹有昌言之拜勤納規諫以致雍和君臣叶心上下無壅永念于此予心惕然間者深詔朝倫大闢言路而箱結相尚啓沃無聞豈朕之誠信未孚邪將庶官狃於因循也今順攷舊規延進讜議凡朕躬過失時政違尤教令之闕遺人情之壅閼並可條上勿或緘藏言近訐者亦議優容文不工者許其直致固將親覽宜體至懷甲申張齊賢罷

四年春二月丙寅 詔舉賢良方正直言極諫三月庚寅呂蒙正向敏中並同中書門下平章事辛卯王化基罷王旦參知政事馮拯陳堯叟同知樞密院事夏四月己未王欽若參知政事

秋九月李繼遷陷清遠軍冬十一月王顯大破契丹于威虜軍五年春二月癸酉 詔曰比司帑廩者以羨剩為勞蓋出納之際有所輕重此可責而不可獎也宜令有司嚴加戒勵無復使然三月李繼遷陷靈州守臣裴濟死之夏六月己卯周瑩罷秋七月甲午朔日有食之冬十月丁亥向敏中罷十一月壬寅合祭 天地于圜丘大赦天下己酉皇子祐封信國公

六年夏四月契丹入寇王超逆戰于定州之望都王繼忠陷于陳辛巳皇子祐薨秋七月癸丑堯王元傑薨九月甲辰呂蒙正罷冬十二月甲子 詔曰朕為民司牧罔敢逸豫冀聞闕政屢詔讜言而群臣奏封罕有極陳得失豈詢求之未至何循默以自持其令御史臺諭內外官各上所見勿為顧避李繼遷攻西涼戊寅赦天下

景德元年春正月丙戌朔大赦天下改元辛丑京師地震丁未復震二月西京潘羅支擊李繼遷繼遷中流矢死三月己亥皇太后崩于萬安宮秋七月丙戌李沆薨庚寅畢士安參知政事八月己未畢士安寇準並同中書門下平章事王繼英樞密使馮拯陳堯叟並改僉書樞密院事契丹入寇乙巳河決澶州閏月以王欽若判天雄軍契丹將撻覽率眾寇威虜順安軍又與契丹主及其國母寇定州駐于陽城浞以求和契丹寇岢嵐軍冬十月王繼忠以契丹來請和命曹利用使于契丹丁未皇弟元份留守京師十一月辛亥契丹寇瀛州又逼冀州庚午皇帝親征王繼忠為契丹請和契丹率眾犯澶州射殺其將撻覽丙子幸北砦戊寅移御澶州北城行宮曹利用還十二月庚辰朔日有食之契丹使韓杞來請和詔諸將按兵壬辰赦河

北癸巳皇弟元份疾以王旦權留守甲午發澶州契丹使丁振來上誓書契丹出塞戊戌皇帝至自澶州

二年春正月庚戌朔大赦天下夏四月己亥詔河北諸州葺城池癸卯王欽若罷馮拯參知政事六月趙德明歸歿秋七月甲子詔復賢良方正能直言極諫博通墳典達於教化才識兼茂明於體用武足安邊洞明韜略運籌決勝軍謀宏遠才任邊寄堪為將帥六科八月戊寅雍王元份薨冬十月乙酉畢士安薨十一月丁巳合祭天地于圜丘大赦天下皇弟元偁封寧王元偁舒王元儼廣陵郡王

三年春二月丁亥王繼英薨戊戌寇準罷王旦同中書門下平章事己亥王欽若陳堯叟並知樞密院事趙安仁參知政事韓崇訓馬知節僉書樞密院事冬十月葬明德皇后

四年春正月甲辰陳堯叟留守京師己未 皇帝朝謁諸陵
發京師丙寅真獻 安陵 永昌 永熙陵及諸后陵二月己
巳幸西京辛卯發西京甲午次鄭州遣使謁周高慶二陵三月
己亥 皇帝至自西京夏四月辛巳 皇后郭氏崩甲午 詔
曰權酷之利素有定規過求羨贏是縱培克自今中外不得增
課庶以息民五月丙申朔日有食之六月乙卯葬 莊穆皇后
秋七月宜州軍校陳進以宜州亂陷柳象州懷遠軍八月庚子
韓崇訓罷冬十月曹利用擊敗賊黨陳進伏誅乙卯 詔曰拷
掠之法素著科條非理擅行茲謂慘酷諸道官司應有非法訊
囚之具一切毀棄

大中祥符元年春正月乙丑天書大中祥符三篇降于左丞天
闕之上戊辰大赦天下改元夏四月甲午詔以十月有事于泰

山王欽若趙安仁為泰山封禪經度制置使丙午作玉清昭應

宮五月戊子 詔貴戚進奉物勿以銷金文繡為飾六月乙未

天書再降于泰山醴泉庚戌赦兗州辛亥群臣上尊號曰 崇

文廣武儀天尊道寶應章感聖明仁孝皇帝秋八月己丑上

太祖 太宗尊謚九月庚申向敏中留守京師甲子 皇帝奉

天書告 太廟冬十月辛卯發京師辛亥享 昊天上帝于泰

山之園壇陳天書于左奉 太祖 太宗配命群臣享五方帝

諸神于山下大赦天下丙辰次兗州十一月戊午幸曲阜進謁

文宣王廟加上文宣王曰玄聖文宣王丁丑 皇帝至自泰山

壬午以正月三日為 天慶節甲申 親享六室十二月皇第

元儼封榮王

二年冬十月甲午 詔天下置天慶觀十一月丙辰 皇帝作文

武七條賜文臣任轉運使以下至知縣武臣任將帥以下至巡檢者

三年春閏二月戊辰赦京畿秋八月 詔以來年春有事于汾陰以陳堯叟為祀汾陰經度制置使冬十一月陝州黃河清十月二月又清向敏中留守京師

四年春正月丙申以六月六日天書再降日為 天貺節丁酉皇帝奉天書發京師庚子至汜水辛丑望拜 諸陵二月辛酉皇帝詣睢上祀 后土地祗奉 太祖 太宗配大赦天下三月次西京丙申謁 安陵 永昌 永熙 元德皇后陵夏四月 皇帝至自汾陰皇弟元儻封相王五月乙未 詔曰峻極之岳神靈王焉其加上五嶽帝號秋七月壬申 詔兩浙福建荆湖廣南路諸州每歲丁錢四十五萬四百千悉降之甲午馮拯

罷八月乙巳河決通利軍

五年夏四月戊申向敏中同中書門下平章事三司言民有販茶違法者許同居告 上曰以利而壞風俗可乎不許秋八月

丙申朔日有食之九月戊子王欽若陳堯叟並樞密使同平章事馬知節樞密副使丁謂參知政事趙安仁罷冬十月戊午

九天司命天尊降于延恩殿諭以本人皇九天之一乃 趙始

祖再降為黃帝後唐時復降王趙氏之族己未大赦天下閏月己巳上 天尊聖號曰 聖祖上靈高道九天司命保生天尊

大帝辛未謁謝 太廟壬申 詔避 聖祖名以七月一日為

先天節十月二十四日為 降聖節乙亥上 聖祖母懿號曰 元天大聖后又加上 太廟六室尊謚丙子群臣上尊號曰

崇文廣武感天尊帝應真佑德上聖欽明仁孝皇帝十一月丙

申親祀 玉皇于朝元殿以 聖祖 太祖 太宗配十二月
壬申改謚孔子為至聖文宣王丁亥以德妃劉氏為皇后
六年春正月辛酉 詔宗正寺以帝籍為玉牒夏五月赦東京
建安軍以鑄 玉皇 聖祖 太祖 太宗尊像成故也秋七
月癸卯 詔天下勿稅農器八月庚申 詔以來春親謁亳州
太清宮辛酉以丁謂為奉祀經度制置使庚午加上 老子號
曰太上老君混元上德皇帝冬十二月戊午朔日有食之丙寅
寇準留守京師

七年春正月壬寅 皇帝奉天書發京師己酉朝謁太清宮庚
戌幸亳州謁 聖祖殿乙卯次應天府丙辰 詔曰應天府
太祖興王之邦也其建南京作鴻慶宮二月辛酉 皇帝至自
亳州壬申恭謝 天地于南郊大赦天下三月丁未 皇子封

慶國公夏四月丙子舒王元偁薨六月乙亥王欽若陳堯叟馬
知節罷寇準樞密使秋七月癸卯王嗣宗曹利用並樞密副使
九月辛卯上 玉皇聖號曰 太上開天執符御曆含真軀道
玉皇大帝冬十二月己未作元符觀

八年春正月壬午朔大赦天下夏四月壬戌寇準罷王欽若陳
堯叟復為樞密使丙寅 詔曰倉庾出納自今勿得以羨餘為
吏課壬申榮王宮火五月庚子放宮人一百八十四人丙午皇
弟元儼降封端王 詔宗室皇親及外庭臣庶之家不得以銷
金戴金金線之類為衣服器用六月己酉朔日有食之閏月己
卯大赦天下秋七月戊午王嗣宗罷冬十一月辛酉皇弟元儼
封彭王十二月辛卯 皇子封壽春郡王
九年春正月丙辰張旻樞密副使夏五月景靈宮會靈觀兗州

景福宮太極觀成秋七月蝗八月丙戌陳堯叟罷九月甲辰丁謂罷丙午陳彭年王曾張知白並參知政事任中正樞密副使宗哥喃廝羅入寇曹瑱擊敗之冬十一月乙卯 詔改元天禧元年春正月薦獻 玉皇大帝于玉清昭應宮上 聖祖天尊大帝仙服于景靈宮辛亥恭謝 天地于南郊大赦天下以四月一日為 天祺節二月戊寅皇弟元偓封徐王己亥陳彭年薨夏四月乙亥放 聖祖金寶牌于天下五月戊申王旦為太尉侍中遇軍國重事不限時日入預參決六月壬申赦西京秋七月丁巳王旦罷八月庚午王欽若同中書門下平章事張旻罷戊寅免牛稅九月癸卯王曾罷李迪參知政事馬知節知樞密院事曹利用任中正周起並同知院事冬大雪二年春二月丁卯 皇子封昇王夏四月庚寅赦天下癸卯馬

知節罷作祥源觀五月壬戌 詔曰民勤稼穡家有儲備所以備流行之災而未俗澆浮罕務蓄積歲或小歉便至流亡豈教導之方未甚篤也今禾麥將稔令所在長吏躬親勉諭無使復然甲子徐王元偓薨六月乙未曹利用知樞密院事秋七月壬申赦天下八月甲辰 詔以 皇子昇王為皇太子大赦天下壬子皇弟元儼封通王冬十二月丙午張知白罷三年春三月戊午朔日有食之是月未能以天書降于乾祐山中夏六月甲午王欽若罷河決滑州戊戌寇準同中書門下平章事丁謂參知政事秋七月壬申群臣上尊號曰 體元御極感天尊道應真寶運文德立功上聖欽明仁孝皇帝八月丁亥大赦天下冬十一月乙卯 詔曰自今犯酒麴銅鑄等條有死刑者去之己巳月重輪辛巳合祭 天地于圜丘大赦天下十

二月辛卯皇弟元儼封涇王曹利用丁謂並樞密使任中正周起並副使

四年春正月乙丑曹瑄僉書樞密院事三月己卯向敏中薨夏六月丙申寇準罷秋七月丙寅李迪同中書門下平章事馮拯樞密使庚子丁謂同中書門下平章事癸酉誅內侍周懷政八月乙酉任中正王曾並參知政事錢惟演樞密副使九月丙辰周起曹瑄罷丁卯赦天下冬十一月戊辰丁謂李迪罷己巳謂仍赴中書視事馮拯同中書門下平章事庚午 詔自今除軍國大事朕自親決餘皆委 皇太子同宰相樞密使等參議施行十二月乙亥 皇帝不豫

五年春正月癸巳赦天下丁酉張士遜樞密副使秋七月甲戌朔日有食之

乾興元年春正月辛未朔改元二月庚子朔大赦天下 詔自今中外所上表咸去稱號群臣請上尊號曰 應天尊道欽明仁孝皇帝從之庚戌 皇帝不豫戊午 皇帝崩于延慶殿聖壽五十五殯于殿之西階群臣上尊謚曰 文明章聖元孝皇帝廟號 真宗冬十月己酉葬 永定陵天聖二年加上尊謚曰 文明武定章聖元孝皇帝慶曆七年再加上尊謚曰 膺符稽古神功讓德文明武定章聖元孝皇帝

臣稱曰宋興承五季之餘天下得離兵革之苦至 真宗之世太平之治洽如也咸平以來 君明臣良家給人足刑措不用契丹請和示以休息德明納款撫以恩信於是朝 帝陵封岱宗祀汾睢謁亳社絕代曠典莫不具舉禮樂明備頌聲洋溢崇本報功以告神明千載一時豈不休哉噫守成之賢致治之盛周

成康漢文景可以比德矣

東都事略卷之四

東都事略卷第五

本紀五

仁宗躰天法道極功全德神文聖武睿哲明孝皇帝 真宗第六子也母曰 章懿皇后李氏嘗夢二日在天其一忽墜以裾承之自是有娠以大中祥符三年四月十四日生是日大雷震章獻明肅皇后以爲巳子七年爲左衛上將軍封慶國公八年拜中正軍節度使兼侍中進封壽春郡王天禧元年兼中書令二年爲建康軍節度使太保封昇王八月立爲皇太子 仁宗容止莊重不安言笑四年 詔中書樞密院及諸司非大事並委 皇太子資善堂裁處以聞乾興元年春二月戊午 真宗崩奉 遺制即 皇帝位于 匱前尊 皇后曰皇太后以 皇帝尚幼軍國事兼權取 皇太后处分已未大赦天下丙寅丁

謂以司徒馮拯以司空兼侍中皇叔元儼封定王三月乙酉作受命寶夏六月庚申誅內侍雷允恭癸亥丁謂貶任中正罷秋七月辛未王曾同中書門下平章事呂夷簡魯宗道並參知政事丙子錢惟演樞密使八月乙巳 皇帝 皇太后初御承明殿垂簾決事九月己卯以天書從葬 永定陵冬十月己酉葬 文明章聖元孝皇帝于永定陵十一月丁卯朔錢惟演罷張知白樞密副使

天聖元年春正月丙寅朔改元秋七月辛巳 天下逋欠八月丙午赦天下九月丙寅馮拯罷王欽若以司空同中書門下平章事

二年春二月癸未 皇太后詔宰臣曰吾受 先帝顧託之深皇帝富于春秋助成正道用乂斯民期見抱孫之歡永遂含飴

之樂此吾之志也更賴三事庶尹百工羣司勉悉乃心同底于道夏五月丁亥朔日有食之秋八月丙辰朔 詔自今奉官已迂改而貪汚者許元奉官以狀聞不以實者劾其罪冬十一月甲午加上 真宗尊謚丁酉合祭 天地于圜丘大赦天下羣臣上尊號曰 聖文睿武仁明孝德皇帝上 皇太后尊號曰 應元崇德仁壽慈聖皇太后乙巳立皇后郭氏

三年夏四月壬子朔 詔恤刑獄冬十月辛酉晏殊樞密副使十一月戊申王欽若薨十二月張知白同中書門下平章事乙丑張耆樞密使

四年夏五月壬午 詔曰 國家勤卹黎庶必期無訟而生齒之繁犯者頗衆朕甚閔焉應天下大辟情理可憫及刑名疑慮者具案以聞有司無得奉駁閏月減江淮發運司歲漕止六百

萬石六月建州劍州邵武軍大水庚寅大雨震雷平地水數尺壞京城民舍河南府鄭州大水秋九月乙卯 詔曰講學之廢久而執卷者不知經義非上之教導有失邪其令講官孫奭馮元舉京朝官博通經術者以名聞冬十月甲戌朔日有食之十二月丁亥 皇帝曰 皇太后欲元日率百官先上 皇太后壽然後受朝 太后曰豈可爲吾而後元會之禮哉王曾奏曰陛下以孝奉母儀而 太后以謙全國體請如 太后令五年春正月壬寅朔 皇帝率百官上 皇太后壽于會慶殿朝于天安殿己未晏殊罷戊辰夏竦樞密副使三月秦州地震夏五月癸亥楚王元佐薨冬十一月癸丑合祭 天地于圜丘大赦天下

六年春二月壬午張知白薨三月丙申朔日有食之壬子張士

遜同中書門下平章事姜遵范雍樞密副使辛酉建太一宮夏四月甲申流星大如斗秋七月河北大水九月遣近臣十七人巡行河北

七年春正月癸卯曹利用罷二月庚申朔魯宗道薨丙寅張士遜罷呂夷簡同中書門下平章事夏竦薛奎參知政事陳堯佐樞密副使三月癸未 詔曰 國家設制策之科將博詢於鯁議有能規朕躬之過失陳宰相之闕遺糾中外之姦回斥左右之朋比述未明之機事貢無隱之密謀以至臺省之官阿私而罔上郡國之吏專恣以濫刑或通受貨財潛行請託或恃憑權勢敢事貪殘並許極言朕當親覽其令百官遇起居日轉對在外臣僚亦許其實封以聞夏四月庚寅大赦天下六月丁未王清昭應宮災甲寅王曾罷秋八月丁亥朔日有食之 詔以天

下職田租送官以數上三司均給之辛卯夏竦樞密副使陳堯
佐王曙並參知政事冬十月丙午京師地震十一月癸亥 皇
帝率百官上 皇太后壽于會慶殿是歲皇叔元儼封鎮王
八年秋九月乙丑姜遵薨己巳趙稹樞密副使冬十月丙申
詔罷榷池鹽地分初陝西京西京南路許解鹽餘皆榷之議者
以輦運之役困軍民至是京西京北河東京東路並聽以見錢
金銀輸京師榷貨務就池給鹽其後商賈流通而官課損矣十
一月戊辰合祭 天地於圜丘大赦天下

九年春二月癸巳 詔曰天下吏給職田所以惠養廉節也而
貪汙之人並緣爲私侵漁細民滋以爲害比詔有司皆從停罷
如聞勤事之吏祿薄不足以自養朕甚愍焉其復職田冬十月
丙戌 詔曰朕遵 列聖之謀荷 慈宸之教于茲八年矣而

搢紳之間名節固勵矜勞者掠美以近名希進者行險以徼寵
詆誣執政干撓有司分屏翰者或奏請之靡厭主按察者或寬
縱之爲得貪而无耻姑務營私老而非材曾不知退繇廉耻之
未飭致風化之靡醇此豈朕之所望哉用稽彞訓申儆羣倫苟
少冒於官箴將自投於公憲布告遐迩朕意焉

明道元年春二月庚戌張士遜同中書門下平章事丁卯 順
容李氏爲宸妃是日薨秋七月乙酉王曙罷八月庚子朔晏殊
樞密副使丙午殊參知政事甲寅王崇勳樞密副使壬戌文德
殿成是夜禁中火己丑 詔求直言丁卯大赦天下冬十一月
甲戌恭謝天地于天安殿遂謁 太廟大赦天下改元癸未皇
叔元儼徙封孟王辛卯封荆王十二月壬寅楊崇勳樞密使
二年春二月乙巳 皇太后饗太廟羣臣上 皇太后尊號曰

應元齊聖顯功崇德慈仁寶壽皇太后丁未 皇帝祀神農于壇乃就耕位執耜行籍田之禮三推有司請止 上曰朕將耕之終畝以勸天下之力農乃耕十二步而止大赦天下羣臣上尊號曰 睿聖文武躡天法道仁明孝德皇帝三月庚寅 皇太后不豫大赦天下甲午 皇太后崩于寶慈殿夏四月罷命婦進獻祈乞恩澤凡表奏無得緣親戚投進禁中事有傳宣令有司實封覆奏內批改官及與差遣未得即行委中書樞密院審取處分天下毋得剏修寺觀聖節所進香合山儀並停 上親政中外大悅己未呂夷簡張耆罷李迪同中書門下平章事夏竦陳堯佐范雍趙禎晏殊罷王隨參知政事李諮樞密副使王德用僉書樞密院事五月癸酉 詔曰大行皇太后保佑冲人十有二年恩勤至矣而言者罔識大躡詆訐一時之事非所

以慰朕孝思也其垂簾日詔命中外毋輒以言 上親攬政而言者多譏斥垂簾日事 上惡其持情近薄故禁之乙亥李諮以父憂起復六月甲午朔日有食之秋七月戊子 詔曰比年以來蝗旱作沴郡國交奏日月相仍豈朕德之不明將天時之 夙夜循省咎實在予自今尊號去睿聖文武四字仍令中外各直言極諫朕將親覽焉八月庚申以內藏錢百萬賜三司初三司以用度不足告于 上 上曰國家禁錢本無內外蓋以助經費也自是歲歉或調發則出內藏以濟之冬十月丁酉葬 莊獻明肅皇后于 永定陵戊午張士遜楊崇勳罷呂夷簡同中書門下平章事王曙樞密使宋綬參知政事王德用蔡齊樞密副使十一月癸亥朔薛奎罷十二月乙卯皇后郭氏廢丁巳詔改元

景祐元年夏閏六月甲子泗州淮汴溢秋八月壬戌有星孛於張翼癸亥王曙薨庚午王曾樞密使卒未以星變大赦天下九月甲辰立 皇后曹氏冬十月丙戌寇邊

二年春二月戊辰李迪罷王曾同中書門下平章事王隨李諮並知樞密院事王德用韓億同知院事蔡齊盛度並參知政事夏四月庚午 詔曰雅樂之作治道所基郊丘宗廟之祠朝廷饗侑之禮人神和會茲實重焉爰命有司攷正鍾律應中外臣僚暨州里儒學草澤博聞之士能洞曉古今雅樂制作及音律得失灰琯測候之法並許所在薦聞或自言官司將較試之五月甲申朔 詔曰朕恭惟 太祖皇帝受天命建大業可謂有功矣 二聖繼統重熙累洽可謂有德矣其令禮官稽按典籍辨 宗配之序定 二祧之位中書門下審加詳閱以稱朕心

於是禮院言我 太祖經綸草昧遂有天下功宜為帝者祖太宗勤勞制作 真宗財成治定德宜為帝者宗 三廟並萬世不毀至於升侑 上帝請自今以 太祖為定配 二宗為迭配將來 皇帝親祠請以 三聖並侑中書門下奏請如禮官議 詔恭依庚寅禁銷金縷金之飾秋七月戊戌羣臣上尊號曰 景祐體天法道欽文聰武聖神孝德皇帝九月新樂成已酉建睦親宅廣親宅冬十一月戊子廢后郭氏薨乙未合祭天地于圜丘大赦天下

三年秋七月初置大宗正司八月乙酉 詔天下士庶之家凡室宇非邸店樓閣无得四輔作闕八非品官無得起門屋非宮室寺觀無得綵繪棟宇及間朱梁柱器用無得純金及表裏用朱非三品以上及宗室戚里之家無得金稜器及用玳瑁器非

命婦無得金爲首飾及真珠裝綴首飾衣服凡帶幕架帕床裙
無得用純錦民間無得乘子其用兜子者所昇無得過二人
非五品以上無得乘鬧裝銀鞍其乘金塗銀粧條子促結鞍轡
自文武升朝以上聽違者物主工匠並以違制論過百日而不
變毀者坐之冬十一月戊寅保慶太后楊氏薨十二月李詔薨
王德用知樞密院事章得象同知院事

四年夏四月甲子呂夷簡王曾宋綬蔡齊罷王隨陳堯佐並同
中書門下平章事盛度知樞密院事韓億程琳石中立並參知
政事王醜同知樞密院事六月乙亥杭州大風雨秋七月戊申
有星數百西南流冬十二月忻代并三州地震

寶元元年春正月甲辰麟府州及陝西大雨雹三月戊戌王隨
陳堯佐韓億石中立罷張士遜章得象並同中書門下平章事

王醜李若冰並參知政事王博文陳執中並同知樞密院事夏
四月辛未王博文薨乙亥張觀同知樞密院事秋七月丙辰大
臣以將郊上尊號上曰唐穆宗謂疆我懿號不若使我爲有
道之君加我虛尊不若居我於無過之地朕常愛斯言羣臣請
不已上刊英睿二字而受之於是上尊號曰寶元體天法
道欽文聰武聖神孝德皇帝冬十一月庚戌合祭天地于圜
丘大赦天下十二月甲子京師地震趙元昊反僭號于夏州
二年夏五月壬子王德用罷夏守斌同知樞密院事六月壬午
削奪元昊在身官爵仍除屬籍有能生擒及斬首來獻者與除
定難軍節度使秋八月甲戌皇子生十一月戊子出禁中真
珠估緡三十萬賜三司上曰此無用之物不欲捐棄不若散
之民間收其直助給邊儲亦可紓吾民之力也丁酉盛度程琳

罷壬寅王巖知樞密院事宋庠參知政事十二月夏人犯保安軍狄青敗之

康定元年春正月庚戌日有食之乙亥元昊圍延州劉平石元孫與賊戰于三川口王師敗績平死之二月丙午赦延州保安軍改元夏守贊罷三月戊寅王巖陳執中張觀罷宋綬晏殊並知樞密院事王貽永同知院事夏四月丙午誅內侍黃德和五月壬戌張士遜以太傅致仕呂夷簡同中書門下平章事六月乙亥夏守贊同知樞密院事秋八月戊午夏守贊罷杜衍同知樞密院事九月壬午李若谷罷宋綬晁宗慤參知政事鄭戩同戩杜衍並改副使辛未范仲淹以任福等出師攻賊白豹城破之冬十一月范仲淹以葛懷敏出師出歸娘谷與夏人

戰敗之十二月宋綬薨

東都事略卷第五

東都事略卷第六

本紀六

慶曆元年春二月辛卯韓琦以任福等與賊戰于好水川任福及耿傅桑懌王珪武英死之己亥皇子昕薨夏五月乙丑皇子昉薨辛未宋庠鄭戩罷王峯正參知政事任中師任布並樞密副使秋八月元昊寇麟府二州戊子元昊陷豐州守臣王餘慶死之乙未毀潼關九月乙亥詔天下立義倉冬十一月丙寅合祭天地于圜丘大赦天下改元

二年春正月契丹聚兵幽薊三月丁巳杜衍宣撫河東辛酉晁宗慤罷己巳契丹遣蕭英劉六符來求關南地夏四月庚寅命富弼使于契丹五月丁巳陞大名府為北京戊寅詔自中宮已下並不得衣銷金縷金壓金陷金明金泥金楞金背金欄金

盤金織金金線撚金等秋七月丙午任布罷戊午呂夷簡判樞密院章得象兼樞密使富弼還癸亥再使契丹九月丙午呂夷簡改兼樞密使乙丑契丹遣邪律仁先劉六符來修好甲午葛懷敏與元昊戰于定川砦敗績冬元昊求納款

三年春正月辛未封皇子曦爲鄧王是日薨癸巳延州言元昊稱夏國遣賀從朮來納款二月遣梁適使于契丹三月戊子呂夷簡守司空軍國大事與中書門下樞密院同議以聞晏殊同中書門下平章事兼樞密使賈昌朝參知政事夏四月癸卯以邵良佐使夏州甲辰韓琦范仲淹並樞密副使乙巳杜衍樞密使夏竦罷甲子呂夷簡罷與議軍國大事五月乙卯朔日有食之乙亥忻州地震丁亥置武學戊子雨上曰天久不雨將害民田朕每焚薌上禱於天昨寢殿中聞雷遽起冠帶露立殿庭

須臾雨雪衣或異枯苗尚可救秋七月甲子王舉正罷甲戌任中師宣撫河東范仲淹宣撫陝西元昊遣使來八月丁未范仲淹參知政事富弼樞密副使癸丑以韓琦宣撫陝西九月乙亥任中師罷冬十月詔韓琦等曰比以中外人望故決意用卿等今琦暫往陝西仲淹弼宜與宰相得象盡心國事毋或有所顧避其當世急務有可建明者悉爲朕陳之壬寅詔曰虞典考三載之績周官計羣吏之治攷課則有限年之制入官則有循資之格然非褒沮善惡則不激厲非甄別流品則不憤發特程式以茂官箴自今京朝官有舉官五人方得磨勘外郎至卿監亦如之其舉者不足增二年甲子鄭戩奏城水洛冬十一月丙寅上清宮災庚寅韓琦使還四年春正月乙亥荆王元儼薨丙子宜州歐希範叛破環州癸

未 詔自今見任兩府及兩省已上官不得陳乞子弟親戚爲館職其進士及第三人已上者一任回無過犯須進經術十卷下兩制看詳可否召試入優等方得除館職或闕人即以嘗有兩府臣僚二人或 兩省已上三人保薦者並令進文字然後補試之丁亥 詔曰周禮大司樂掌學政以六藝教國子漢制光祿勳典任籍以四行察三省郎令蔭法之所原古典刑之是憲夫冢嗣先錄以篤爲後之體支子限年以明入官之重非惟爲國造士是乃爲臣立家咨爾百僚朕茲意壬辰 詔曰廉素者士之常而富貴者是人之所欲也昔 先帝詔復公田合王制班祿之差得聖人養賢之道然郡縣受地有無不齊其議所以均之三月壬申 詔曰夫儒者通乎天地人之理而兼明古今治亂之原可謂博矣然學者不得騁其說而有司務先聲

病章句以牽拘之則吾豪雋竒偉之士何以奮焉士有明純樸茂之美而無教學養成之法其飭身勵節者使與不肖之人雜而並進則夫懿德敏行之賢何以見焉今朕建學興善以尊子大夫之行而更革弊法以盡學者之材其於教育之方勤亦至矣有司其務嚴訓導精察舉以稱朕意學者其思進德修業而無失其時於是諸路州府軍監並立學如修學者多及二百人以上許更置縣季夏四月令杜杞往平歐希範五月庚午忻州地震丙戌元昊遣使來稱臣更名曩霄秋七月水洛城成庚戌范仲淹宣撫陝西河東癸未契丹遣邪律元衡來告舉兵攻夏州八月富弼宣撫河北戊戌保州軍亂九月辛卯田况以李昭亮平保州庚午晏殊罷甲申杜衍同中書門下平章事兼樞密使賈昌朝樞密使陳執中參知政事冬十一月壬寅改謚 真

宗五后尊謚壬午合祭 天地于圜丘大赦天下十二月乙未
封曩霄為夏國主

五年春正月乙酉范仲淹富弼罷丙戌杜衍罷賈昌朝同中書
門下平章事兼樞密使王貽永樞密使宋庠參知政事吳育龐
籍樞密副使二月辛卯 詔曰比者京朝官須因人保任始得
遷官朕念廉士或不能以自進也其罷之三月己未 詔太宗
正寺曰朕思古之人君莫不厚親戚以輔王室始邦家而化天
下 宋興八十餘載宗室蕃衍宜令睦親宅諸院教授官課經
典文詞以聞辛酉韓琦罷甲子杜杞誘歐希範醢之甲申赦陝
西戊申章得象罷陳執中同中書門下平章事兼樞密使庚戌
吳育參知政事丁度樞密副使秋七月甲子廣州地震乙卯荆
南岳州地震冬十月乙卯契丹使來獻捷辛酉升祔 章獻

章懿于真宗廟室大赦天下庚戌宰相罷兼樞密使

六年春二月戊寅青州地震三月辛巳朔日有食之庚寅登州
地震五月甲申雨雹地震秋八月癸酉吳育樞密副使丁度參
知政事九月丁卯登州地震 上曰山東連地震宜防未然之
變其下登州嚴武備

七年春二月己未賈昌朝吳育罷夏竦樞密使文彥博樞密副
使丁酉文彥博參知政事高若訥樞密副使冬十月乙丑河陽
許州地震十一月乙未加上 真宗尊謚戊戌合祭 天地于
圜丘大赦天下王則反于貝州

八年春正月丁丑文彥博宣撫河北閏月辛丑文彥博平貝州
甲辰赦河北戊申文彥博同中書門下平章事甲子衛士作亂
于禁中丙午王則伏誅夏四月壬辰丁度罷明鎬參知政事五

月夏竦罷宋庠樞密使龐籍參知政事六月甲午明鎬薨河北大水冬十二月乙丑朔 詔改元

皇祐元年春正月甲午朔日有食之二月涓井蠻寇邊秋八月壬戌陳執中罷宋庠同中書門下平章事龐籍樞密使高若訥參知政事梁適樞密副使九月廣源州蠻寇邕州

二年春三月戊子朔 詔以九月有事于 明堂夏四月乙丑

詔曰明堂之禮前代並用鄭康成王肅義說兼祭 昊天上帝

已為變禮 國朝自 祖宗以來三歲一親郊即禘祭天地而

百神靡不從祀 明堂正當三歲親郊之期而禮官所定上祭

昊天五帝而不及 地祇又配坐不及 祖宗未合 三朝之

制今移郊為大享蓋為民祈福若祭天而不祭地又 祖宗不

得禘配於禮未安其將來親祀明堂宜合祭 昊天 皇地祇

奉 太祖 太宗 真宗並配而五帝神州地祇亦親獻日月

河海諸神悉如圜丘從祀之數以稱朕躬事 天地 祖宗神

靈之意五月廣源州蠻遁秋九月辛亥大享 明堂大赦天下

冬十一月秀州地震

三年春三月庚申宋庠罷夏五月眉州進瑞麥圖 上曰朕嘗

禁四方瑞物今則西川麥秀可謂真瑞矣其賜田夫束帛以敦

勸之六月無為軍獻芝草 上曰朕以豐年為瑞賢臣為室至

於草木虫魚之異焉足尚哉仍戒州郡自今無得以聞秋七月

丙辰 詔曰兖州仙源縣自 國朝以來孔子子孫知縣事使

奉承廟祀近歲廢而不行非所以尊 先聖也自今宜以孔子

子孫知縣事冬十月作隆儒殿庚子文彥博罷龐籍同中書門

下平章事高若訥樞密使梁適參知政事王堯臣樞密副使

四年夏四月廣源州蠻儂智高反五月乙巳儂智高陷邕州司
戶參軍孔宗旦死之癸丑儂智高陷橫州丙辰陷貴州庚申陷
龔州辛酉陷藤州又陷梧州又陷封州守臣曹覲死之壬戌陷
康州守臣趙師旦死之癸亥儂智高陷端州丙寅儂智高圍廣
州六月丁亥狄青樞密副使秋七月壬戌智高去九月庚午命
狄青討儂智高冬十月丁丑儂智高陷賓州甲申智高入據邕
州十一月壬寅朔日有食之

五年春正月戊午狄青敗儂智高于歸仁 智高遁二月甲申
赦廣南三月甲子奉 太祖御容赴滁州 太宗御容赴并州

真宗御容赴澶州立原廟夏四月壬申狄青還五月乙巳狄青
樞密使高若訥罷丁未孫沔樞密副使六月己亥奏新樂秋閏
七月壬申龐籍罷陳執中梁適並同中書門下平章事劉沆參

知政事冬十一月己巳合祭 天地于圜丘大赦天下

至和元年春正月癸酉貴妃張氏薨三月己巳王貽永孫沔罷
王德用樞密使田况副使庚申改元夏四月甲申朔日有食之
秋七月丁卯程戡參知政事戊辰梁適罷八月丙午劉沆同中
書門下平章事冬十月辛卯朔太白晝見

二年春三月丙子 詔封孔子後為衍聖公夏四月己亥契丹
遣使以其主繪像來獻且求 御容六月陳執中罷戊申文彥

博富弼並同中書門下平章事冬十二月庚戌太白晝見

嘉祐元年春正月庚申 皇帝不豫甲子大赦天下二月甲辰

御延和殿閏三月癸未王堯臣參知政事程戡樞密副使夏四
月河北大水壬子河決商胡六月乙亥太社太稷壇壞己卯
詔曰迺者淫雨降災大水為沴兩河之間決溢為患皆朕不德

天意所譴其令中外實封言時政闕失母有所諱秋七月葬出
紫微垣八月庚戌朔日有食之癸亥狄青罷韓琦樞密使九月
辛卯恭謝 天地于大慶殿大赦天下改元冬十一月辛巳王
德用罷賈昌朝樞密使十二月戊申朔劉沆罷曾公亮參知
政事

二年春正月丁丑雄霸州地震二月己未契丹遣耶律防來求
御容秋八月丁卯天下置廣惠倉九月契丹遣蕭扈來求 御
容冬十月乙巳以張昇奉 御容使于契丹

三年夏六月丙午文彥博罷韓琦同中書門下平章事賈昌朝
罷宋庠田況樞密使張昇副使乙亥交趾獻異獸秋八月己未
王堯臣薨冬閏十二月丁丑 詔曰朕惟國之取士士之待舉
皆不可以曠久亦不可以泛冗冗則課校不審久則賢雋或滯

用間歲之期而約貢舉之數以精其選著為定法申敕有司而
高下之往嘗不次而用若猶例進終至溢負故增其任以舉其
材緩其進以圖其效此天下之士所同欲而朕果於必行也若
夫高材異行施於有政忠謨嘉猷見諸行事已試之狀為眾所
推必有非常之恩以示至公之道咨爾多士體朕意焉

四年春正月丙申朔日有食之三月辛卯 詔凡宮室之制器
用之度冠服之章妾媵之數其令中外各遵守前後詔條違者
御史臺及開封府糾察以聞諸路即委轉運使提點刑獄及長
吏如詔施行夏四月癸酉 詔曰先王推紹天之序而尊賢之
義褒其 嗣賓以殊禮豈非聖人稽古報功之大典哉 國家
受命之云繼周而王雖民靈欣戴歷數允集而虞賓將遜德美
丕顯頃者推原本始褒及支庶恩則厚矣而義未稱將上采姚

以之舊略循周漢之典詳其世嫡優以公爵異其仕進之路申
以土田之錫俾寢廟有奉庶幾乎春秋通三統之義厚先代之
制矣其以柴氏最長一人封崇義公與河南鄭州差遣給公田
十頃以奉周祀至知州資叙即別與差遣却取以次近親人襲
爵永爲定式五月丙辰田况罷六月辛亥放宮女二百一十四
人冬十月癸酉禘祭于太廟大赦天下

五年夏四月癸未程戡罷孫抃樞密副使五月京師地震六月
乙丑詔曰朕聞前代之稱治者君臣同心上下輯睦人知禮
義之節俗無激訐之風向其德之盛也朕雖弗敏竊嘗慕焉自
今臣僚如有輒上封章告人罪及以赦前事言者並當訊劾之
言事之臣雖許風聞宜務大體如事關朝政無憚極論自餘小
過細故勿須察舉秋七月庚戌詔曰夫和平醇一之政行則

民休美之氣應險刻媮薄之路啓則民戚慘之變生蓋風化之感
天下其猶影響之相從也御史執法嘗爲朕言宜深詔執事以
遏浮競之風其令中書門下務采端厚忠實可以表厲風俗之
士並進于朝以啓迪朕心其詭激辨巧敢涉朋比之迹者必行
放棄之罰庶幾朝廷清明百異消弭以起治平咨尔攸司其服
朕命冬十一月辛丑宋庠罷曾公亮樞密使張昇孫抃參知政
事歐陽脩陳升之趙槩並樞密副使

六年春三月己亥富弼以母喪罷夏四月庚辰陳升之罷包拯
樞密副使六月壬子朔日有食之秋七月癸巳詔曰朕惟善
治之主以天下耳目爲視聽而不自任其聰明耳目之官今臺
諫之任也夫以四海之廣萬事之衆臺官數人不能以周知固
將詢及士大夫而其間傾邪險害之徒不惟朝廷義理所在謂

職在言責執必施行輒徇己之愛憎倚依形似扇造語言以中
善良豈朕所以圖治之意哉昔夏后氏之時官師相規漢之公
卿耻言人過今吾士大夫乃違古人之守蹈薄俗之爲日益之
流漫不知止甚无謂也其令中書門下開徹百工務行敦實閏
八月庚子曾公亮同中書門下平章事張昇樞密使歐陽脩參
知政事胡宿樞密副使冬十月壬辰 詔以 皇姪起復知宗
正寺

七年春正月乙亥 詔自今南郊以太祖皇帝定配三月乙
卯孫抃罷趙槩參知政事吳奎樞密副使夏五月庚午包拯薨
秋八月己卯 詔曰人道親親王者之所先務也蓋二帝之隆
治由斯出朕甚慕之右衛大將軍岳州團練使某 皇兄濮安
懿王之子而朕之猶子也少鞠于宮中而聰智仁賢見於風成

向者選於宗子近藉命以治宗正之事使者數至其第乃崇執
謙退久不受命朕默然有嘉焉朕承 先帝遺緒奉承 聖業
罔敢失墜夫立愛之道自親者始固可以厚天下之風而上以
嚴夫宗廟也其以爲皇子九月辛亥大享 明堂大赦天下
八年春二月癸未 皇帝不豫甲申赦天下三月辛未 皇帝
崩于福寧殿聖壽五十四甲午殯于殿之西階羣臣上尊謚曰
神文聖武明孝皇帝廟號 仁宗冬十月甲午葬 永昭陵元
豐六年加上尊謚曰 體天法道極功全德神文聖武睿哲明
孝皇帝

臣稱曰神文皇帝即位四十二年恢廓有聖度以大公至正臨
御不爲喜怒愛憎之所遷尊敬大臣容受直諫其於宮室苑囿
無所興作三司請以玉清舊地爲御苑上曰吾奉 先帝苑囿猶

謂其廣何以苑爲其事 天地 宗廟則齊粟不自勝或遇時
變必跣足露立致禱於庭退則靜思所以致變者所幸張貴妃
每責以正禮見其以珠玉爲飾則却而不視惟帝衾裯多施以
繒紵元昊不臣懷以文德契丹渝盟敦守大信專務恭儉以德
化民天下大辟有疑而情可閔者皆令上讞之所活歲以千數
吏有先入死者則終身不用嘗曰朕未嘗嘗人以死况敢濫刑
罰乎是以四海之內舉熙熙然至於昆蟲草木各安其生又能
傳政 賢明克昌景祚烏虜仁哉

東都事略卷第六

東都事略卷第七

本紀七

英宗躰乾膺歷隆功盛德憲文肅武睿聖宣孝皇帝濮安懿王
第十三子也母曰仙遊縣君任氏以天聖十年正月三日生宣
平坊宅 仁宗鞠養于宮中景祐三年授左監門衛率府副率
四年遷率府率五年遷左千牛衛將軍又遷左領軍衛將軍寶
元二年皇子生以慶歷元年十一月壬申出還 濮邸特授右
千牛衛大將軍皇祐元年遷右衛大將軍岳州團練使 仁宗
春秋高皇嗣未立至和三年不豫天下共以爲憂大臣文彥博
富弼韓琦及范鎮司馬光呂誨等屢以爲言嘉祐六年 英宗
居 濮王憂乃命起復右衛大將軍廷秦州防禦使知大宗政
寺固辭不受七年立以爲皇子八年春三月辛未 仁宗崩奉

遺制即 皇帝位于匱前尊 皇后曰皇太后癸酉大赦天下
丙子 皇帝不豫己卯 詔請 皇太后權同處分軍國事夏
四月己酉立 皇后高氏 皇長子封安國公顥祈國公五月
富弼樞密使秋九月辛亥 皇長子封淮陽郡王顥封鄴國公
冬十月甲午葬 神文聖武明孝皇帝于永昭陵己酉赦兩京
治平元年春正月改元夏五月戊申 皇太后歸政閏月己亥
皇長子封穎王顥封東陽郡王冬十一月籍陝西鄉丁為義
勇軍十二月吳奎以父憂罷王疇樞密副使

二年春二月癸卯王疇薨三月己巳頒明天歷夏五月癸亥陳
升之樞密副使秋七月癸亥富弼罷庚辰張昇罷文彥博樞密使
呂公弼副使八月庚寅大雨乙未 詔曰蓋聞古之聖賢在位陰陽和
風雨時日月光星辰靜黎民阜蕃以底休平朕甚慕之朕猥以

眇身託於王公之上夙夜以思懼不能上承 先帝鴻業而比
年以來水潦為沴乃八月庚寅大雨京師室廬墊傷被溺者衆
大田之稼害于有秋竊迹災變之來曾不虛發豈朕之不敏於
德而不明於政與將天下刑獄滯寃賦徭煩苦民有愁歎亡聊
之聲以奸其順氣與不然何天戒之甚著也今飭躬焦思欲消
大異而未聞在位者之忠言進祈自新厥路何由焉應中外
臣僚並許上寶封言時政闕失及當世之利病可以佐元元者
悉心以陳毋有所諱執政大臣皆朕之股肱協德交修以輔朕
之不逮冬十一月壬申合祭 天地于圜丘大赦天下

三年春正月丁丑 皇太后手書 濮安懿王譙國夫人王氏
襄國夫人韓氏仙遊縣君任氏宜令 皇帝稱親即園立廟
詔曰稱親之禮謹遵慈訓追崇之典豈易克當且欲以塋為園

即園立廟既而御史呂誨等言 濮王典禮未正議遂寢三月
癸酉上以雨潦 詔諸路轉運使提點刑獄躰量刑獄寃滯民
間疾苦速行辨理及加賑卹如事稍重即具聞奏夏四月丙申
詔曰夫左道亂法淫祀敗俗与夫賊善良之人皆古之所甚禁
而在上者所同疾也自今轉運使常行檢察毋得寬縱庚戌胡
宿罷郭逵同僉書樞密院事秋九月壬子朔日有食之夏人寇
慶州冬十月丁亥 詔今後每三年一開科場郭逵宣抚陝西
兼權判渭州甲辰羣臣上尊號曰 躰乾膺歷文武聖孝皇帝
十一月戊午 皇帝不豫 十二月壬寅立 皇長子頽王爲
皇太子大赦天下
四年春正月丁巳 皇帝崩于福寧殿聖壽三十八殯于殿之
西階羣臣上尊謚曰 憲文肅武宣孝皇帝廟號 英宗秋八

月癸酉葬 永厚陵元豐六年加上尊謚曰 體元膺歷隆功
盛德憲文肅武睿聖宣孝皇帝
臣稱曰 英宗皇帝之在潛藩也允蹈恭儉力行禮義而天資
明睿物望攸屬 仁宗皇帝雅知其賢授以重器在位五載盡
循 父道雖以憂勤損壽然甚盛之德固已度越前王憲章後
嗣矣



